

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM**

PRAVILNIK
o objavljivanju sudskih odluka, akata i informacija o predmetima,
na službenoj web stranici Općinskog suda u Visokom

Visoko, maj 2024. godine

Na osnovu člana 31. stav 1. Zakona o sudovima u Federaciji Bosne i Hercegovine ("Službene novine Federacije Bosne i Hercegovine" broj 38/05 i 22/06, 63/10, 72/10, 7/13, 52/14 i 85/21), člana 8. stav 1. tačka k) Pravilnika o unutrašnjem sudskom poslovanju („Službeni glasnik Bosne i Hercegovine", broj: 66/12, 40/14, 54/17, 60/17, 30/18 i 83/22) i na osnovu Smjernica za objavljivanje sudskih i tužilačkih odluka, akata i informacija o predmetima, broj 07-02-3-1279-3/2024 od 21.3.2024. godine, predsjednik Općinskog suda u Visokom donosi

P R A V I L N I K

o objavljivanju sudskih odluka, akata i informacija o predmetima, na web stranici Općinskog suda u Visokom

I – OPĆE ODREDBE

Član 1. **(Predmet Pravilnika)**

Pravilnikom o objavljivanju sudskih odluka, akata i informacija o predmetima, na web stranici Općinskog suda u Visokom (u daljem tekstu: Pravilnik) uređuje se postupak i način objavljivanja sudskih odluka, akata i informacija o predmetima na web stranici Općinskog suda u Visokom.

Član 2. **(Ciljevi objave odluka, akata i informacija o predmetima)**

Objavom sudskih odluka, akata i informacija o predmetima putem web stranice Suda doprinosi se optimalnom nivou transparentnosti rada suda, harmonizaciji sudske prakse i unapređenju pravne sigurnosti. Na taj način će se povećati odgovornost pravosuđa, povjerenje građana i drugih zainteresovanih subjekata u rad pravosuđa.

II - OSNOVNI PRINCIPI

Član 3. **(Javnost)**

Sudske odluke, akti, kao i informacije o predmetima, predstavljaju javno dobro, te trebaju biti javno dostupni i redovno ažurirani.

Član 4. **(Zaštita ličnih podataka)**

(1) Lični podaci obrađivati će se u skladu sa zakonima i pravnim standardima uz poduzimanje propisanih mjera zaštite.

(2) Pravo na privatnost može se ograničiti u predmetima od javnog interesa preciziranim ovim Pravilnikom i Smjernicama za objavljivanje sudskih i tužilačkih odluka VSTV-a BiH, akata i informacija o predmetima, kao i iz drugih razloga propisanih zakonima koji uređuju ovu oblast.

(3) Lični podaci mogu biti objavljeni i uz izričitu pismenu saglasnost fizičkog lica, koje je prethodno poučeno od strane ovlaštenog uposlenika suda o posljedicama davanja takve saglasnosti.

(4) Pojedinaac čiji se lični podaci obrađuju i koji su dostupni javnosti, ima pravo da pod određenim uslovima ishodi brisanje tih podataka u svjetlu prava na zaborav (u slučaju rehabilitacije, brisanja sudske osude i dr.).

Član 5.

(Tačnost i blagovremenost)

(1) Sudske odluke i informacije o predmetima od javnog interesa koje se objavljuju treba da sadrže tačne i blagovremene informacije.

(2) Prilikom obrade zahtjeva fizičkih lica za izmjenu ili brisanje objavljenih podataka, odnosno ispravku netačnih i dopunu nepotpunih podataka postupati će se sa hitnošću.

Član 6.

(Jasnost i razumljivost)

Sud će voditi računa da prilikom objavljivanja na web stranici suda, sadržaji budu objavljeni na način koji je jasan i razumljiv javnosti i medijima.

Član 7.

(Vrijeme trajanja objave odluka)

Pravosnažna odluka će biti uklonjena sa web stranice suda najkasnije protekom roka od godinu dana od dana objavljivanja, osim u situaciji kada svrha objavljivanja zahtijeva duži vremenski rok, pri tome vodeći računa o pravu na zaborav.

III - ZNAČENJE IZRAZA

Član 8.

(Značenje izraza)

Anonimizacija je postupak obrade ličnih podataka s ciljem zaštite identiteta osobe na koju se podaci odnose.

Lični podaci su podaci potrebni za identifikaciju fizičkog lica definisani Zakonom o zaštiti ličnih podataka Bosne i Hercegovine.

Predmeti od javnog interesa su:

Krivični predmeti:

- a) krivična djela protiv čovječnosti i vrijednosti zaštićenih međunarodnim pravom,
- b) koruptivna krivična djela definisana listom koruptivnih krivičnih djela VSTV-a BiH,
- c) organizovani kriminal,
- d) terorizam,
- e) pranje novca,
- f) krivična djela u vezi sa utajom poreza,
- g) ubistvo,
- h) trgovina ljudima,
- i) porodično nasilje,
- j) krivična djela u vezi sa neovlaštenom proizvodnjom i prometom opojnih droga,
- k) krivična djela iz mržnje,
- l) krivična djela protiv države i društvenog uređenja.

Parnični predmeti:

- a) diskriminacija,
- b) zaštita okoliša,
- c) autorska prava, zaštita intelektualne i industrijske svojine,
- d) rodna ravnopravnost,
- e) zaštita potrošača,
- f) stečaj,
- g) privatizacija,
- h) kolektivni sporovi,
- i) privredni sporovi sa inostranim elementom,
- j) sporovi o državnoj imovini.

IV- OBJAVLJIVANJE SUDSKIH ODLUKA, AKATA I INFORMACIJA O PREDMETIMA

Član 9.

(Službena web stranica suda)

- (1) Na službenoj web stranici suda objavljuvat će se pravosnažne sudske odluke, akti suda, te informacije o predmetima u toku, za koje predsjednik suda ili postupajući sudija procijene da bi trebali biti objavljeni.
- (2) Predsjednik suda ili postupajući sudija će pravosnažne sudske odluke, akte suda, te informacije o predmetima u toku, koje namjerava objaviti na web stranici suda, elektronskom poštom ili na drugi adekvatan način dostaviti Stručnom svjetniku za informisanje i odnose s javnošću.
- (3) Osobe zadužene za objavu na web stranici Općinskog suda u Visokom su Stručni savjetnik za informisanje i odnose s javnošću i Stručni savjetnik za informaciono – komunikacione tehnologije (IKT).
- (4) Web uredništvo obavlja poslove održavanja i ažuriranja sadržaja službene web stranice Općinskog suda u Visokom.

Član 10.

(Objava pravosnažnih sudskih odluka)

- (1) Objava pravosnažnih sudskih odluka vršit će se uz poštivanje zakona i principa definisanih ovim Pravilnikom, a prema sljedećim kriterijima:

- a) odluke od javnog interesa,
- b) odluke od značaja za sudsku praksu,
- c) odluke u kojima postoji zakonska obaveza objavljivanja,
- d) odluke za koje je iskazano interesovanje profesionalne, akademske zajednice, medija i javnosti,
- e) odluke koje po ocjeni suda imaju prioritet u objavljivanju.

(2) Pravosnažne sudske odluke objavljivati će se u posebnoj sekciji web stranice u modulu „SUDSKE ODLUKE“, razvrstane po oblastima i pravnim terminima.

(3) Pravosnažne odluke koje su objavljene na web stranici suda istovremeno se u anonimiziranoj formi u word formatu, uz prateći obrazac za indeksaciju sudskih odluka, dostavljaju putem elektronske pošte Visokom sudskom i tužilačkom vijeću Bosne i Hercegovine - Odjel za sudsku dokumentaciju i edukaciju radi njihove trajne pohrane u centralnoj Bazi sudskih odluka..

Član 11. **(Informacije o predmetima u toku)**

(1) Informacije o predmetima u toku, uključujući i informacije o nepravosnažnim odlukama objavljivati će se u formi saopštenja za javnost, u kategoriji pod nazivom “ODNOSI SA JAVNOŠĆU”, potkategorija “VIJESTI”, sekcija “SAOPŠTENJA ZA JAVNOST”.

(2) Izuzetno, u predmetima od javnog interesa, uz saopštenje za javnost kojim se daje informacija o nepravosnažnim odlukama, može se objaviti i izreka odluke u PDF formatu.

(3) Sud putem saopštenja za javnost može objaviti informacije i o pravosnažnim sudskim odlukama, s tim da će integralni tekst pravosnažne odluke biti dostupan javnosti putem linka koji će upućivati na kategoriju “SUDSKE ODLUKE”.

(4) Minimum podataka koje Sud treba obezbijediti za objavu:

- a) Krivični predmeti:
 - Naziv krivičnog djela, broj predmeta i kratak opis pravnog instituta.
- b) Građanski predmeti:
 - Podoblast, vrsta i predmet spora, broj predmeta i kratak opis pravnog instituta.

Član 12. **(Raspored suđenja)**

Zbog izuzetne važnosti rasporeda suđenja za javnost i medije na službenoj web stranici dostupan je raspored suđenja u kategoriji “Oglasna ploča” i na naslovnoj web stranici u gornjem desnom uglu.

Član 13. **(Anonimizacija)**

(1) Pravosnažne sudske odluke, akti suda i informacije o predmetima u toku, koji se objavljuju na web stranici suda, anonimizirat će se u skladu sa Uputstvom za anonimizaciju Visokog sudskog i tužilačkog vijeća Bosne i Hercegovine, broj: 07-02-3-1279-2/2024 od 21.3.2024. godine (u daljem tekstu Uputstvo).

(2) U predmetima od javnog interesa, po ocjeni suda, može se objaviti ime, prezime, nadimak, godinu i mjesto rođenja osumnjičenog/optuženog/osuđenog/oslobođenog u krivičnom postupku, odnosno ime i prezime stranaka u građanskom, dok se ostali lični podaci precizirani u članu 2. Uputstva anonimiziraju.

(3) U situaciji kada se otkrivaju podaci precizirani u stavu 2. ovog člana, potrebno je voditi računa da se zaštite i posebne kategorije ličnih podataka kao raso, nacionalno ili etničko porijeklo, religijsko uvjerenje, zdravstveno stanje, seksualni život i dr., osim u slučaju kada ti podaci čine biće krivičnog djela ili su neophodni za razumijevanje objavljenog sadržaja.

(3) Lični podaci iz stava 2. ovog člana će se anonimizirati kada se ispuni svrha objave, a u krivičnim predmetima najkasnije kada nastupe uslovi za brisanje osude.

V- ZAVRŠNE ODREDBE

Član 14. (Završne odredbe)

Za sve što nije regulisano ovim Pravilnikom primjenjivat će se Smjernice za objavljivanje tužilačkih i sudskih odluka, akata i informacija o predmetima broj: 07-02-3-1279-3/2024 od 21.3.2024. godine.

Član 15. (Stupanje na snagu)

Ovoj pravilnik stupa na snagu danom donošenja a stupanjem na snagu ovog Pravilnika prestaje važiti Pravilnik za objavljivanje sudskih odluka na web stranici Općinskog suda u Visokom, broj: 041-0-SU-14-00 1640 od 3.11.2014. godine i Upute o načinu anonimizacije sudskih odluka broj: 041-0-SU-14-001641 od 3.11.2014. godine.

Broj: 041-0-SU-24-001316
Visoko, 29.5.2024. godine



PREDSJEDNIK SUDA

mr. Enes Behlulović